

BERMEO. Erantzunak batzeko, postontzia ipini dabe udaletxean

IRATXE ASTUY

Antolakuntza, Informatika eta Kalidade Saileko arduradunek aztertuko dabez herritarren erantzunak

Udaleko zerbitzuen ganeko itaunketea egiten dabilz

Uritarren eritxiak jakin gura dabez, lehiatila bakarreko zerbitzurako

Iratxe Astuy |

Herritarrei eskaintzen jakezan zerbitzuak gero eta hobeak izan daitezkan asmoagaz, beharrenean dabil Bermeoko Udala aspalditik. Helburu horregaz sortu zan Antolakuntza, Informatika eta Kalidade Sailea 2001. urtean. Ahalegin horretan, beraz, beste pauso bat emoten dabilz sail horretako arduradunak, orain.

Udaleko zerbitzuen ganean herritarrek daukien eritxia jakin gurean dabil Bermeoko Udala, egunotan. Horretarako, inkesta antzeko orrialde bat itzi dabe, asteon, herriko etxe guztietako postontzietan. «Itaun batzuk egin gura izan deuseguz herritarrei, Udalak emoten dauzan zerbitzuak zein neurritaraino konforme dagozan jakiteko-tan», azaldu eban Juan Karlos Goienetxea Bermeoko alkateak.

Orrietan agertzen diran itaunei erantzuteko eskatzen deuse Udalak herritarrei, mesede moduan. Udaletxeko kontziliopean postontzi antzekoa ipini dau Udalak, orria bete eta gero, inkesta orria bertan sartu daien herritarrek. Jakina, anonimoa izango da inkestea. Erantzunak emoteko orduan, herritarren izena ez da agertuko orrian. «Ekimen honen bitartez, herri-

tarren berbea entzun gura dogu», adierazo eban Udal ordezkariak, etxeetara bialdutako gutunean.

Gai zerrendetan agertzen diran erantzunak banan-banan aztertuko dabez Antolakuntza, Informatika eta Kalidade Saile-

ko beharginek. Itaunen erantzunak aztertu eta gero, Udaleko zerbitzuak hobetzeko kontuan hartzekoak lotzen hasiko da Udalak, gitxi-gitxika. «Horretarako ezinbestekoa dogu herritarren laguntzea», azpimarratzen dabe Udaleko Antolakuntza Saileko arduradunak.

ITAUN ETA IRADOKIZUNAK

Zerbitzu bakotzak daukan garrantzia jakin gura dabe

Erantzuteko hamasei itaun egin deuse Antolakuntza, Informatika eta Kalidade Sailak herritarrei. Talde bitan bananduta dagoz itaunak. Alde batetik, Udalak eskaintzen dauzan zerbitzuen ganeko hainbat datu jakiteko itaunak egin dabez.

Beste alde batetik, udal zerbitzuek herritar bakoitzantzeko daukan garrantziaz jakiteko itaundu dabe. Galderak ez eze, herritarren iradokizunak edo sujerentziak batzeko tartea egin dabe Antolakuntza, Informatika eta Kalidade Sailekoek, orrian bertan.

Lehiatila bakarra

Lehiatila bakarreko zerbitzua zabaltzea dauka Udalak helburutzat. Zerbitzu barri hori martxan ipini aurretik, baina, herritarren iradokizunak kontuan hartu gura dauz Udalak. «Udaleko begarginak be herritarren esanetara prestatu daitezkan», argitu eban Goienetxea uriko alkateak. Lehiatila bakarra ipini gura dabe herritarrei laguntzeko eta udaletxera doazenean aterik ate ibili ez daitezkan. Zerbitzua Ertzilla kalean ipintzekotan dagoz.

GERNIKA-LUMO. Martira arte luzatuko dira

Hainbat ikastaro emoten hasiko dira Kultur Etxean, datorren astetik aurrera

I.A. |

Gernika-Lumoko Kultur Etxeak hainbat ikastaro antolatu dauz, hasi barri dogun 2003. urterako. Guztira, zazpi ikastaro egiteko aukerea zabalduko jake herritarrei. Ikastarook datorren astetik aurrera emoten hasiko dira, Kultur Etxean bertan.

Urtarrilaren 14tik martxoaren 17ra bitarte, dekorazioaren ganeko ikastaroa egingo dabe, uriko Kultur Etxean. Asteartetan eta egunenetan eskainiko dabez eskolak: goizez eta arratsalde. Urtero, arrakastatsuenetarik bat izaten da dekorazioaren ganeko ikastaroa. Hori dala eta, aurtun be hiru talde egiteko asmoa daukie Kultur Etxeko arduradunak, izena emoten daben herritar guztiek aukera izateko ikastaroan parte hartzeko.

Gernika-Lumoko Kultur Etxeak eratu dauen beste ikastaro bat buztigintzako da. Ume eta nagusientzako eskolak izango dira. Datorren astetik hasita, astelehen eta eguaztenetan emongo dabez nagusientzako buztigintzako eskolak, 19:00etatik 21:00etara. Umeentzako eskola orduak, barriz; astean behin izango dira: eguazte-

nero, 17:00etatik 19:00etara, hain zuzen be. Martxoaren 26an amaituko dira ume zein nagusientzako emongo dabezan bustigintza ikastarook.

Aurreko ikastaroaren epe eta nagusientzako ordutegi bardinean emongo dabe, be bai, argazkigintza ikastaroa, uriko Kultur Etxean. Argazkiak ataraten ikasteko oinarrian jakin behar dana irakatsiko deuse ikasleei.

Bitxiak egiteko ikastaroa

Bitxigintza ikastaroak, bestalde, urtarrilaren 17tik apirilaren 11ra bitarte iraungo dau. Bitxigintza ikastaroa barikuro eskainiko dabe Kultur etxeok, 18:00etatik 21:00etara arte. Guztira, 39 orduko ikastaroa izango da hori.

Lore zapalduakaz konposizinoak egitea gustoko daukientzat beste ikastaro bat antolatu dabe, datozen hileotarako. Astelehen eta eguaztenetan eskainiko dabez eskolak, 19:00etatik 21:00etara arte. Azkenik, Tiffanys motako lanparak egiteko eskolakaz osotuko da Kultur Etxeko ikastaroen zerrendea. Astelehenetan eta eguaztenetan emongo dabez eskolak, 10:00etatik 12:00etara.

LAGUARREAN**MUXIKA**

Gabonetan egin eban ipuin lehiaketako sariak banandu dauz Udalak; adin talde bakotzeko, hiru

Gabonetako ipuin lehiaketaren saridunen izenak jakin eragin dauz Muxikako Udalak. Guztira, 46 lagunek hartu eban parte ipuin lehiaketan. Parte-hartzaileen adinaren arabera, lau taldeetan banatu eban sariak eta talde bakotzeko hiru sari eskaini ebazan Muxikako Udalak. Leire Astoreka, Izaskun Zaldunbide eta Andoni Bilbaok irabazi eban sariak, umeen atalean. Amaia Urlezaga, Roke Ojanguren eta Urko Lasa ziran, bestalde, bigarren taldeko irabazleak. Gaztetxoaren artean, Jon Meabebasterretxea, Irantzu Anton eta Miren Urlezagazek eskuratu ebazan sariak. Ipuin egile nagusien taldean, Izarne eta Atxeli Meabebasterretxea eta Ianire Urkiolak izan ziran lehenengo hiru sari irabazleak.

AGENDEA**MUNDAKA**

Karabana solidarioa: Saharako herriei laguntzeko karabana solidarioan parte hartzeko kanpaina egiten dabilz Katillotxu alkarteko emakumeak, egunotan, herrian. Botika eta janarien batze-kanpainan parte hartu gura dabenek alkartearen lokaletara

zein herriko loteria administrazinora jo leikie materiala izten. Janarien artean, olio, arroza, atun latak, azukrea, pastak eta lekariak itzi leitekez.

BERMEO

Ipuin kontalaria: Muxerengak eskainiko dau ipuin saioa gaur, Joxe Miel Barandiaran liburutegian. Umeentzako saioa izango da,

eta 18:00etan hasiko da. Sarrerea doan izango da.

Bai Euskarari: Bai Euskarari izeneko akordioaren ganeko berbaldia egingo dabe, 20:00etan, liburutegian.

GERNIKA-LUMO

Zinekluba: *Oriente Oriente* filma emongo dabe, 20:30ean, Lizeo antzokian.